

# KUPU SB rasmikan Mu'tamar Bahasa Arab

**BANDAR SERI BEGAWAN,** Khamis, 17 Disember. - Majlis Perasmian Mu'tamar Bahasa Arab Kebangsaan Negara Brunei Darussalam (NBD) 1442 / 2020 anjuran bersama Kolej Universiti Perguruan Ugama Seri Begawan (KUPU SB), Universiti Islam Sultan Sharif Ali (UNISSA) dan Rabitah Antarabangsa Alumni Al-Azhar Brunei Darussalam diadakan bertempat di Dewan Ta'lim, KUPU SB.

Hadir selaku tetamu kehormat dalam majlis perasmian tersebut ialah Pemangku Setiausaha Tetap, Kementerian Hal Ehwal Ugama (KHEU), Awang Haji Mohd. Serudin bin Haji Timbang.

Mu'tamar yang diadakan akan dijadikan sebagai wadah bagi mengeratkan kerjasama pelbagai pihak di NBD dalam mengembangkan peluang dan mutu pengajaran bahasa Arab dalam mengukuhkan jati diri Negara Zikir.

Ke arah itu, Mu'tamar ini diharapkan mencapai tujuan berikut iaitu perkongsian maklumat pengajaran bahasa Arab antara institusi di NBD; mengenal pasti ruang kerjasama dalam pengajaran bahasa Arab di NBD dan merancang pelbagai kerjasama antara institusi.

Acara dimulakan dengan bacaan Surah Al-Fatihah dan Asmaul Husna dan nyanyian Lagu Kebangsaan 'Allah Peliharakan Sultan' beramai-ramai.

Dalam ucapan alu-aluan Pengarah Pusat Bahasa KUPU SB, Dr. Haji Abang Hadzmin bin Haji Abang Taha selaku Pengerusi Bersama menyampaikan penghargaan kepada semua jemputan dan peserta yang hadir bagi sama-sama membincangkan mengenai kemajuan bahasa Arab di NBD.

Dr. Haji Abang Hadzmin turut



**PEMANGKU Setiausaha Tetap, Kementerian Hal Ehwal Ugama (KHEU) (depan, lima dari kanan) pada sesi bergambar ramai pada Majlis Perasmian Mu'tamar Bahasa Arab Kebangsaan Negara Brunei Darussalam (NBD) 1442 / 2020 anjuran bersama Kolej Universiti Perguruan Ugama Seri Begawan (KUPU SB), Universiti Islam Sultan Sharif Ali (UNISSA) dan Rabitah Antarabangsa Alumni Al-Azhar Brunei Darussalam diadakan bertempat di Dewan Ta'lim, KUPU SB.**

menjelaskan bahawa Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam semasa keberangkatan tidak berjadual baginda ke KUPU SB pada 22 Januari 2020 lalu menitahkan agar pihak yang berkaitan menumpukan masa untuk membina NBD dengan ilmu-ilmu yang bermanfaat antaranya ilmu bahasa Arab, mempertahankan program pendidikan dan memperkasa bahasa Arab.

Pada 16 September 2020, sekali lagi Kebawah Duli Yang Maha

Mulia memberikan perhatian yang sama dengan menitahkan pemeriksaan menyeluruh termasuk guru, cara mengajar dan latihan bagi mendapatkan hasil pembelajaran bahasa Arab yang bagus. Titah ini mestilah disyukuri, dijunjung dan ditani bersama.

Sehubungan itu, salah satu usaha yang diungkapkan adalah melalui Mu'tamar Brunei tersebut. Majlis diteruskan dengan tayangan video perutusan dari Mesir, Oman, Thailand dan Indonesia yang menyampaikan tahniah atas pelaksanaan Mu'tamar tersebut dan seterusnya menjelaskan

### Siaran Akhbar dan Foto : Kolej Universiti Perguruan Ugama Seri Begawan

kepentingan bahasa Arab tersebut untuk terus dikembangkan dan dihidupkan.

Juga ditayangkan beberapa video pendek pertandingan bahasa Arab yang dicipta oleh mahasiswa dan mahasiswi KUPU SB.

Majlis diteruskan dengan penyampaian hadiah kepada pemenang tayangan video bahasa Arab KUPU SB dan sijil penghargaan kepada peserta Nadwah Mubaarak disempurnakan oleh tetamu kehormat majlis.

Turut hadir dalam majlis perasmian tersebut ialah Pemangku Penolong Ra'ies KUPU SB, Datin Dr. Hajah Noor Hira binti Haji Noor Kaseh; pengarah-pengarah, ketua-ketua jabatan KHEU, pegawai-pegawai utama, pensyarah dan mahasiswa serta mahasiswi KUPU SB.

Selesai daripada majlis perasmian, juga diadakan sesi perkongsian, perbincangan dan perancangan bertempat di Dewan

Tarbiyah, KUPU SB di mana ia memfokuskan kepada perkongsian maklumat perkembangan pengajaran bahasa Arab antara institusi di NBD sepanjang tahun 2020, usaha-usaha dalam meneruskan dan meningkatkan kerjasama dalam pengajaran bahasa Arab, meningkatkan minat terhadap bahasa Arab dan memantau serta menilai Ru'yah Mubaarak (wawasan bahasa Arab Brunei), merancang pelbagai kerjasama antara institusi dan sesi perkongsian dapatan kajian dan program pengajaran bahasa Arab di NBD.

Beberapa institusi, jabatan dan bahagian yang menyertai Mu'tamar berkenaan termasuk Universiti Brunei Darussalam (UBD), UNISSA, Jabatan Perkembangan Kurikulum, Kementerian Pendidikan, Jabatan Hal Ehwal Masjid, Jabatan Peperiksaan, Bahagian Kenaziran dan Bahagian Kurikulum KHEU.



**PEMANGKU Setiausaha Tetap, KHEU menyampaikan sijil penghargaan kepada peserta Nadwah Mubaarak.**

## COVID-19 : 359 sampel ujian dilaksanakan

### Siaran Akhbar dan Infografik : Kementerian Kesihatan

**BANDAR SERI BEGAWAN,** Rabu, 16 Disember. - Kementerian Kesihatan memaklumkan kepada orang ramai bahawa alhamdulillah, tidak ada kes baharu disahkan setakat 12.00 tengah hari ini, menjadikan jumlah keseluruhan kes COVID-19 di Negara Brunei Darussalam adalah seramai 152 orang.

Melalui Siaran Akhbar mengenai Situasi Terkini Jangkitan COVID-19 di Negara Brunei Darussalam (NBD), Kementerian Kesihatan juga memaklumkan bahawa setakat ini, NBD mencatatkan 224 hari kes sifar, iaitu bagi kes terakhir jangkitan tempatan COVID-19 sejak laporan terakhir dicatatkan pada 6 Mei lalu.

Dalam pada itu, setakat ini, sebanyak 11 kes import dicatatkan, iaitu sejak kes terakhir jangkitan tempatan berkenaan dilaporkan.

Menurut Kementerian Kesihatan, satu kes aktif masih menjalani rawatan di Pusat Pengasingan Kebangsaan ketika ini, di mana ia menjadikan jumlah keseluruhan kes yang sembuh setakat ini, seramai 148 orang.

Kementerian Kesihatan turut

memaklumkan mengenai Situasi Terkini Jangkitan COVID-19 di NBD, di mana seramai 691 orang sedang menjalani pengasingan diri mandatori, sementara seramai 9,376 orang menamatkan pengasingan diri mandatori sejak Mac 2020. Seterusnya, dalam tempoh 24 jam lalu, sebanyak 359 sampel ujian virus SARS-CoV-2 dilaksanakan dan ini membawa

jumlah keseluruhan ujian makmal dijalankan sejak Januari 2020 ialah sebanyak 80,035 ujian.

Untuk maklumat lanjut dan perkembangan terkini, orang ramai boleh melayari Laman Sesawang Kementerian Kesihatan, iaitu [www.moh.gov.bn](http://www.moh.gov.bn) atau menghubungi Talian Nasihat Kesihatan 148 atau melalui aplikasi BruHealth.

#### Ringkasan Kes

Kes Baru Hari Ini	Jumlah Keseluruhan Kes		
0	152		
Kes Sembuh Hari Ini	Kes Aktif	Kematian	Sembuh
0	1	3	148

Kes terakhir jangkitan tempatan COVID-19	Jumlah kes import sejak kes jangkitan tempatan terakhir dilaporkan
Dilaporkan pada 6 Mei 2020 (224 hari yang lalu)	11 Kes

#### Ringkasan Pengasingan Diri

Jumlah yang sedang menjalani Pengasingan Diri Mandatori	Jumlah yang telah menamatkan Pengasingan Diri Mandatori (sejak Mac 2020)
691	9,376

#### Ringkasan Ujian Virus SARS-CoV-2

Jumlah Ujian yang dilaksanakan dalam tempoh 24 jam	Jumlah keseluruhan ujian makmal dijalankan (sejak Januari 2020)
359 sampel	80,035